

Q X M A N G A

SAUTA 1

Nkoto pi'ya qi qiyamakanqa'ma tana

1. Ma okä qämanga pi'ya qi hna mhe'ä yatä'na Nkoto pi'ya qi hä'ä somnga fa qoä ta fa qiyamakanqa ti. 2. Ha nhe'a qoätinga hna tawata mhe'ä niya inä pi'ya pi'ya qi hna mhe'ä niya qomä avä'na qheänqa ti. Ha nhe'a qoä qamqaminqamnga qai'ya qiyäma noe inä e'ä pngama qätvanqa ti. Ha tvatä'nanga Nkotoi'ya Hikoäpa aqo e'ä pnga au hä'ämti neäpna nameä qapmeänqa ti.

3. Ha nameä pmetä'nauntä Nkoto tha qätanqa ti. Ma anga yä'ä wä äunana qätanqa ti. Ha tä'nanga yä'ä wä qäunanqa ti. 4. Wä ha hunä'nanga Nkoto hingo nu'wana yä'ä awa hetäni qu'wananqa ti. Ha ni'yauntä Nkoto yä'ä napätata finänga wä naunata finänga qiyä noeta ha yata'ma natata qheänqa ti. 5. Ha niya wä naunata yata'manga ya'va smto qana qätanqa ti. Ma qiyä noeta yata'manga hipi'ya qana qätanqa ti. Ha hetä'na aunga wä ha naunangi'yä äta hipi'ya nhengi'yä iya navi'yanga anga nte 1 qhe'ätinga yä'ä quwanqa ti.

6. Ma ha wä'nauntänqanga Nkoto tha qätanqa ti. E'ätinga yä'ä napätna wena qamtangana qätanqa ti. Fi qoä mha'i hna tvatängoti fi hä'ä so'i wena qamtangana qätanqa ti. Ha he'ängota äwakngati qomä avä'na henana qätanqa ti. 7. Nkoto ha tä'nanga qai'ya tä'napä yä'ä ha'a natemota e'änga yä'ä qapätanqa ti. Ha yä'na aqo e'ä finga qoä tau hna tvatängoti finga hä'ä so'i weta'ma qheänqa ti. Ha yä'na äwakngatinga avä'na qheänqa ti. 8. Aqo ha ni'yanga avä'na ati'nanga ya'va tiyä'ä qana qätanqa ti. Ma a qätemonqanga wä naunangi'yä äta hipi'ya nhengi'yä iya navi'yanga anga nte 2 qhe'ätinga yä'ä quwanqa ti.

9. Ma anga yä'ä ha wä'nauntänqa Nkoto tha qätanqa ti. Ma e'ä qoä mhaknga mha qätvanqa yä'ä nuwa qainga fa'ina pnga ätvana qätanqa ti. Ha yä'ängota hatoänga fiya fiyaunga yeä natemoä wana qätanqa ti. Ha tä'nanga yä'ä ha qätemonqa ti. 10. Yeä ha temoä'nanga aqo ya'va qoä qana qätanqa ti. Ma e'ä nuwa fa'ina natvä wä'na a'manga ipi'ya pnga qana qätanqa ti. Ha natatauntä Nkoto hingo nu'wana yä'ä awa temo'äni qu'wananqa ti.

11. Auntänqa Nkoto tha qätanqa ti. Qoä mhamtä iya qatä'ä inä ita qaqainga ätemona qätanqa ti. Ma finga hi'ya hanga natemota finga na'a qaqainga qiyata'ma temona qati'yana. Ma iya finga hiya na'iyata hauka noeta hi'ya hanga heta'ma temona qati'yana. Ma pi'ya qi hi'ya hanga nhe'a qäi tuwauntänqa qai'ya hi'yauntä nave qai'ya qhäimangotapä aväti'ya ha'a feta'ma hi'ya hanga a'ma temona qati'yana qätanqa ti. Ha tä'nanga yä'ä ha qätemonqa ti. 12. Qoäuntänqa yä'ä iya qatä'ä inä ita qaqainga natemoä quwanqa ti. Ma finga na'a qaqainga na'iyata qai'ya na'a qäm qhäimangotapä aväti'ya ha'a temota'ma qiyata'ma qätemonqa ti. Ma iya fiyanga qai'ya qhäimangotapä aväti'ya ha'a temota'ma hauka hi'ya hanga qätemonqa ti. Ha temoä'na Nkoto hingo nu'wana awa temo'äni qu'wananqa ti. 13. Ha nhe'a auntä wä naunangi'yä äta hipi'ya nhengi'yä iya navi'yanga anga nte 3 qhe'ätinga yä'ä quwanqa ti.

14. Ha wä'nanga auntänqa äta Nkoto tha qätanqa ti. Ma tiyä'ä tauntä wä hunata'ma qaqainga hmpi'yä ätemhauya. Ha qätemhauta naphäungauntä finänga wä hunata'ma finänga hipi'ya heta'ma napäthu namhäu pmhäuta'ma qati'yana. Ha nhe'auntä pi'ya qi'ma to'ä nisau pmhäuta'ma temhauya qati'yana. Inä ha

napmhäu yatoänghutauntä amä'ä aqoä quyawa'ma nathau ma tanga quyawau qana ma tanga quyawa hna nhe qämqau qana thuta'ma pmhäuta'ma qati'yana. Inä hipiya'ma qämnga'ma quyawa'ma ä thauta'ma pmhäuta qana. 15. Ha nhe'a tiyä'ä tauntä ha napmhäunga qoä mhau wä hmakhuta'ma temhauna qati'yana qätanqa ti. Nkoto ha tä'nauntä yä'ä ha qätemonqa ti. 16. Nkoto pane'a ha natatauntä wä na'a hmakata'ma wä hunqa na'a hivä'u qiyamakanqa ti. Ma okä na'atinga smtoinä tata'ma niyamaka inä wanqa nanga atinga hipinä tata'ma niyamaka qu'umäthenqa ti. Avä'ui ha niyamakanga äta sanäka va'u aqa qiyamakanqa ti. 17. Ma Nkoto apiyä niyamaka tiyä'ä yämiu qu'umäthenqa anga qoä tau wä hmakhuta'ma qu'umäthenqa ti. 18. Ha niyamakata hanqonga smto'inä tata'ma niyamaka hanqoänga hipinä thuta'ma qiyamakanqa ti. Wä hunqa apiyä ha napmhäunga qamqaminqinä smto nheta hipi'ya nheta hana ni'yä watoängota namhäu pmhäuta'ma niyamaka qu'umäthenqa ti. Nkoto ha tä'nauntä natemoä'nanga yä'ä awa hetäni qu'wananqa ti. 19. Auntä wä naunangi'yä hipi'ya nhengi'yä äta iya navi'yanga anga nte 4 qhe'ätinqa yä'ä quwanqa ti. 20. Auntänqa Nkoto äta tha qätanqa ti. E'ä pngaunga pi'ya pi'ya mtnga hanga e'ä mhau nhou qänga yakhauta qunminqa ätemhauya qätanqa ti. Inä inga qawa hä'ä ta'i qamqaminqam nappiyä yakhauta'ma ätemhauya qätanqa ti. 21. Ha natatauntä Nkoto pi'ya qi okä na'a ipi'ya pngau whauta a niyamaka inä pi'ya pi'ya mtnga hanga e'äu nhou au yakhauta wanqa qaqainga aqapiyäi ta aqa qiyamakanqa ti. Ha niyamaka äta inga fa inä pi'ya qi hv'a inqa qaqainga fa aqa qiyamakanqa ti. Nkoto apiyäi ha niyamakanga yä'ä awa hetäni qu'wananqa ti. 22. Ha nu'wana apiyä qetamanga pmhäuta'ma pane'a

qutanqa ti. Ha nutata tha qutanqa ti. Hai'ya me'änga qoäpa nami'yä hu'unana. Haintänqa hai'ya me'ä qunminqa ha natemhou e'ä qamqaminqau namtithau watnhuta'ma qati'yana qutanqa ti. Inä inga apiyähén ya'u yä'ä qoä qamqaminqau hai'ya me'ä qunminqa natemhau pmhäuta'ma qati'yana qutanqa ti. 23. Auntä wä naunangi'yä hipi'ya nhengi'yä äta iya navi'yanga anga nte 5 qhe'ätinga yä'ä quwanqa ti.

24. Ha wä'nanga auntä Nkoto äta tha qätanqa ti. Qoäuntänqa pi'ya pi'ya mtnga hanga qaqainga ätemhauya qätanqa ti. Anga u khauta qaqainga fa qa'vam pmhäuta qaqainga fa temhauna qati'yana. Inä pi'ya wanqa qaqainga qoä mhau yakhauta apiyä ätemhauya. Ha qätemhautanga me'ä namisaunga qu'ya quiva nhaiungapä aväti'yä ha'a namiyä huta'ma temhauna qati'yana qätanqa ti. Ha tä'nanga yä'ä ha qätemonqa ti. 25. Nkoto ha natatauntä yä'ä pi'ya qi u khauta qaqainga fa qa'vam pmhäuta qaqainga fa inä wanqa yakhauta qaqaingapiyä ta yä'ä qiyamakanqa ti. Nkoto ha niyamakanga yä'ä awa hetäni qu'wananqa ti.

26. Auntä Nkoto tha qätanqa ti. Ma anga nai yä'ä amä'ä yamakänona. Amä'änga nai'ya nto nhe'äpä ha'a yamakänona qätanqa ti. Ha qiyamakätonga amä'ä aqoänga qoä au'na inä pi'ya qi'ma hä'äi napmhäu namhäu pmhäuta'ma yamakänona. Anga pi'ya qi ipi'ya pngau qoenguwa fa inga fa inä qoänga u ke'a fa qa'vam qapmeänguwa fa inä pi'ya qoä mhau qiyaketonguwa apiyä ta aqapiyäi'na hä'äi napmhäu namhäu pmhäuta'ma yamakäno qati'yana qätanqa ti. 27. Nkoto ha natata yä'ä amä'ä niyamakatanga aqoi'ya qaiva nhe'äpä ha'a qiyamakanqa ti. Anga amä'ä qoka hanqoi ta äpaka fi ta qiyamakanqa'ma qati'yä.

28. Ha niyamaka auntänqa Nkoto amä'ä isä'u'i qeta pmhäita'ma pane'a awamanga fi qutanqa ti. Ha nutata tha qutanqa ti. Qinga ime'ä yä'ä qoäpa nheä whi'inana. Ha nheä watoänghitanga qi'ya ime'äuntänqa amä'ä qunminqa natemoä nuwhau qoä qheänqapänkam'na nhu namtithau pmhäuta'ma qati'yana. Ha napmhäungautä hä'äi napmhäu qoä ta inä pi'ya qi a qheänqa qeta namhäu pmhäuta qana. Inä pi'ya qi e'äu we'a fa inga hä'ä som qiyaketonguwa fa inä pi'ya natimäta mtnga hanga qoä tau qiyaketonguwa apiyäi ta aqa namhäu pmhäuta qana qutanqa ti.

29. Nkoto ha nutata äta tha qutanqa ti. Ni pi'ya pi'ya hi'ya hanga inä na'a hanga qiyamaka a qheänqa anga yä'ä qi'ya qa'anhi nhita'ma awä nätatm qati'yana. Inä iya qaqainga hauka hi'ya hanga qoenqa a ya'u yä'ä qi'ya qana. Apiyänga yä'ä qi'ya ita qa'anhi nanhai pmhäita qana qutanqa ti. 30. Ha nhe'a pi'ya pi'ya mtnga hanga qoä tau qiyaketonguwa aqoänga qatä'ä qu'wa fa iya qu'wa hauyainqa inqa a qimananqa qa'anhi nhuta qana. Anga qoä tau qa'vam napmhäunga aqoä inä inga hä'ä som qiyaketonguwa aqoä inä wanqa qoä mhau qiyaketonguwapiyä ta qu'ya ita a nhuta'ma qati'yana. Nkoto ha utä'nanga yä'ä ha qheänqa ti.

31. Ha hetä'na Nkoto pi'ya pi'ya niyamakä qu'wa hingo nu'wana yä'ä okä qetamanga hetäni qu'wananqa ti. Auntä wä naunangi'yä hipi'ya nhengi'yä äta iya navi'yanga anga nte 6 qhe'ätinga yä'ä quwanqa ti.

SAUTA 2

1. Ma Nkoto pi'ya pi'ya hä'ä somnga fa qoä taunga fa qunminqa a nheä quwanqa ha niyata niyamakä nuwi'yä yä'ä aqapu qiyamakhenqa ti. 2. Ma Nkoto wamnga ha niyatanga nte 6 ha'ma qiyanga ti. Wamnga ha ni'yä nuwa yä'ä aqapu qise'a hetä'na nte 7 au qätemonqa ti. Nte 7 ati temcä'nanga Nkoto

yä'a wamnga mi'ya häu qapmeänqa ti. 3. Nkoto ha niyata nte 7 tanga okä awamanga qana natata nte yä'a aqoi'yama nhe qainga weta'ma manantka qisenqa ti. Anga aqo pi'ya natimäti'ya niyamakata wamnga ni'yä nuwi'yä yä'a aqapu ipäka qiyamakhe'a nhe'a nte 7 aunga yä'a häu napmeä'ma manantka a'ma qisenqa ti.

Amä'a isä'u wamnga qoä Ite'nau qapmeängiya'ma tana

4-5. Ha nhe'a pane'a tanga Yäwe Nkoto pi'ya qi hä'a somnga fa qoä taunga fa ha'a ha'a niyata qiyamakanqa'ma iya natä qu'wi.

Ha nhe'a Nkoto qoä ta fa hä'a somnga fa yamakä'nanga qoä taunga iya qi qatä'a qi fi hna mhe'a qiyanaqa ti. Inä ita qi fi qoä tauntä hna mokä'va niyata'ma mhe'a qiyanaqa ti. Ma anga Nkoto hä'a somtä piya fi hna mamoenäpa qi'ya hetä'ma mhe'a qiyanaqa ti. Inä amä'a hanqoä qi qoä tau ita wamnga phiuta'ma hna mhe'a yatänguwa'ma ita hna mätemo'a a'ma qiyanaqa ti. 6. Ha nhe'a aunga piya hna mäi'ya niyata qiyuntä qoä mhauntä mtnga qawa nanga natemoä nuwata äta qhau'ya noeäpatauntä qoä qamqaminqamnga e'a hanga qheänqa ti. 7. Ha hetä'na auntä Yäwe Nkoto qoä fi nake amä'a nangati qiyamakanqa ti. Ha niyamaka Nkoto qoä amä'a nanga qiyamaka ati hima fauntä mtnga namota aqoi'ya mtnga quwiyanaqa ti. Ha wiyä'nanga yä'a amä'äqo pmeäta'ma mtnga hanga aqo qätemonqa ti.

8. Ha hetä'na Yäwe Nkoto qäm ita wamnga fi qäpiyanqa ti. Anga qoä ya'va Ite'na au mapa qiyäpmanqa hintä qäpiyanqa'ma qati'ya. Wamnga qäpise'a hetä'naunga amä'a ha niyamaka aqoi au qu'umäthenqa ti. 9. Ha hetä'na Yäwe Nkoto wamnga aunga iya qaqainga yamakä'na qetamanga qävenqa ti. Anga amä'a aqoä hingo nu'wanhunga okä iya hauka qetamanga hetängoti nu'wanhu mtnga nu'umäthu nantvhuu nhuta'ma yamakä'na nave qätonqa ti. Iya ha natoä watä'naunga äwaknga iya hiwatä'lu nave qätonqa ti. Hiwanga amä'ai mtnga wiyata'ma nave qätonqa ti. Amä'a hauka iya aunga qänhuta yä'a mäpe'auntä hna mtnga hanga pmhäuta'ma qätonqa ti. Ma iya hiwanga amä'ai awa'ma quyva'ma na'anqa wiyata'ma nave qätonqa ti. Hauka iya aunga qänhutanga yä'a awa'ma fa quyva'ma fa aqa na'anqa haiuta'ma qätonqa ti.

10. Ha hetä'na qoä Ite'na auntä e'a fati wamnga au e'a wiyata'ma qoeäpanqa ti. Ha noeäpa e'a atintänqa napätna yä'a hivä'u hivä'u qai'yainga quwanqa ti. 11. Ha nhe'a e'a nampä 1 iwanga ya'va Piso'na ti. E'a iwanga änga ya'va Havitä aunga qamqaminqam navauktota quwato. E'a iwanga qoä nkota hanga hetä'nau watoä'ma qati'ya. 12. Ha nhe'a qoä ta qätaunga nkota hanga nhe'a nkota okä awamanga qhe. Inä iya ptetiyan qai'ya mtä titnänga awi'ya qi'ya hanga natoä quwa. Inä hawa qai'ya ya'va onikisi a fanga qhe. 13. Ha nhe'a e'a nampä 2 iwanga ya'va Nkiyo'na ti. E'a iwanga änga na'a ya'va Kusi aunga qamqaminqam navauktota quwato. 14. Ha nhe'a e'a nampä 3 iwanga ya'va Täiktisi ti. E'a iwanga änga na'a ya'va Äsitiyä au nuwata mapa qiyäpmanqa hintä quwato. Ha nhe'a e'a nampä 4 iwanga ya'va Yuptetisi ti.

15. Ha hetä'na Yäwe Nkoto amä'a aqoi nameä Ite'naunga wamnga au qu'umäthenqa ti. Amä'a aqo wamnga niyata qetamanga nameä pmeäta'ma qu'umäthenqa ti. 16. Ha nu'umäthe'a Yäwe Nkoto amä'a aqoi täpa nuwiyata tha qutanqa ti. Ntinga iya hauka fiyau fiyaunga aqa qhuinama nta qana. 17. Ha nhe'a ntinga iya amä'a awa'ma quyva'ma na'anqa mhäuta iwatinga hauka anga iwa nantni'ina. Okä mänqa ya'atnana. Ma nti nannga hengotanga okä anuwanama yä'a napata qana qutanqa ti.

18. Ha hetä'na Yäwe Nkoto tha qätanqa ti. Amä'ä taqonga qai'ya qaiwana pmeätanga okä qeta mhe'ä qiyana. Ni amä'ä aqoi ä nuteäta qi'ya aqa qetamanga pmhäita'ma fi yamakmana qätanqa ti.

19. Ma qäm Yäwe Nkoto yäqoe'a fa inga fa qoä mhauntä qiyamakanqa manga heänqa. Ma a qiyamaka aqoäi namä napa amä'ä aqoi ya'va utma yana quwiyanqa ti. Anga tha namta amä'ä aqo ya'va äi äi utana qi'yotiya namta quwiyanqa ti. Ha wiyä'na amä'ä aqo ya'va utma qiyanqa ti. Ya'va utma ha yä'nanga ya'va äi äi utä'nanga anga yä'ä qai'ya ha'a qo'onanguwa ti. 20. Ha hetä'na amä'ä aqo u khauta aqoäi ta qa'vam pmhäuta aqoäi ta inä inga hä'ä so'i yakhauta aqoäi ta yä'ä aqaqoäi ya'va utma qiyanqa ti. Ha nhe'a Ätäm aqo ta aqa aväti'ya napmhäi ä uteäta fi qi hna mhe'ä qiyanqa ti.

21. Ha hetä'ma Yäwe Nkoto amä'ä aqo sä'ä wenana mtatä'na sä'ä phi'ya qoenqa ti. Sä'ä phi'ya wetä'inä Yäwe Nkoto aqo sä'ä yäwa fi qäpenqa ti. Ha niya aqo yäwa qäpe'aunga nkuwa fa huyatä'na äta qeta qiyamakanqa ti. 22. Ha ni'yauntä Yäwe Nkoto yäwa amä'ä aqointä qäpe'a nameä äpaka fi qiyamakanqa ti. Äpaka i ha niyamakanga namä napa amä'ä aqoi yänga quwiyanqa ti.

23. Ha wiyä'nanga amä'ä aqo okä yä'ä awa qana qätanqa ti. Ha natatauntä tha qätanqa ti.

Qai'ya yanga anga nqa tauntä qatemo'iya. Inä nkuwa a va'u nqa tauntä qatemo'iya.

Inga ya'va äpakiya utmana. Anga qokauntänqi hetä'ma nutatm quti'yana qätanqa ti.

24. Ha hetä'na inga qokauntänqi hetä'ma tuwauntänqa tha'a heta ti. Amä'ä hanqo qi äpaka fi mtnga nu'umätanga anga qänmqoi ta qanäi ta nu'yätm'a nu'wanga qai'ya äpaki ta nku namanhinga anga yä'ä fatina temhaita ti.

25. Ha hetä'na amä'ä aqo ta qai'ya äpaki ta isä'u qaka qi miyo'a qomä avä'na qapmeängiya ti. Ha napmhäinga wampä qi fi muwinqa qomä hi qapmeängiya ti.

SXUTA 3

Isä'u Nkoto sä'ä pane'a qata muwi'ya qiyangiya'ma tana

1. Ha nhe'a Yäwe Nkoto pi'ya natimäta mtnga hanga qa'vam pmhäuta'ma qiyamakanqa hanqoänga na'anqa ha hetänguwa qi smtita aqonga na'anqa qaqäinga okä qoäpa qheänqa ti. Na'anqa ha nhe'auntä smtita aqo äpaki tha qutanqa ti. Ma Nkoto okä tha qäta täna. Wamnga taunga iya ta natoä quwanqaunga hauka fi qi namthai mänqa hi'inana qäta täna qutanqa ti.

2. Ha utä'na äpaki sä'ä smtita aqoi tha qutanqa ti. Ma wamnga taunga iya fiya fiyaunga haukanga qa'anhi namtatä nito qana. 3. Ha nhe'a iya äwaknga iwa qätonqa a'manga tha qeäta qana. Isauka iya aunga anga mänqa hita qana. Inä ä qi mamai'ya hita qana. Qi isauka a nanhinga qi ä namhäinga qi anga napea'ma qati'yana qeäta qana qutanqa ti.

4. Ha utä'na smtita aqo tha qutanqa ti. A'ana. Okä naphaita mhe'ä qiyana. 5. Qisänguinga isauka a nanhinga anga qi'ya hingo yä'ä awa na'anhi quno okä qetamanga temona qi'yava. Inä qinga Nkoto hetängotapä ha'a nhai awa'ma fa quyva'ma fa na'anqa nhai pmhäita qana qutanqa ti. Ma anga Nkoto qi ha'a nhai pmhäita hetä'na qi na'anqa nhea'ma naptota qäta heänqava qutanqa ti.

6. Ha utä'na äpaki iya au hingo nuwa'nanga qai'ya hauka nanata'manga okä qetamanga hetäni nu'wana qiyäfa qu'wananqa ti. Auntä äpaki quno tha qämtanqa ti. Ma ni na'anqa qaqainga'ma mämqa'manga okä awa manga qheänqava qämtanqa ti. Ha namta nuwa'na äpaki yä'ä isauka namtva qänanqa ti. I ha na'nauntä fi qai'ya qokoi wiyä'na aqo ya'u fi qänanqa ti. 7. Ha nanhingauntänqa isä'u quno namthi qupä numakhi na'anqa qheängiya ti. Yä'ä quyv'a iya ti'yona namthi qiyangiya'ma qati'ya. Na'anqa ha nhaingauntä yä'ä hingo ni'yainhinga qaka miyo'a avä'na hetäni qi'yainangiya ti. Ha ni'yainhi auntä iya fika qu'wa namtvhi u nakthinginä qaka niyamakhi qiyongiya ti.

8. Auntä qa'afainä yä'ä ymnga natä wä'naunga amä'ä aqo ta qai'ya äpaki ta isä'u Yäwe Nkoto wamngau qänga niyaketa yä'na qata quwiyangiya ti. Qata ha nuwhinga isä'u Yäwe Nkoto hingo wanqa'ma iya natoä watä'nau äwam ya qhäinangiya ti. 9. Isä'u ya ha hinängiya qi Yäwe Nkoto amä'ä aqoi mä'ä nutata nti äm pmeängnauya qutanqa ti.

10. Mä'ä ha utä'na amä'ä aqo tha qutanqa ti. Ma nti wamnga tauntä napatn yä'änga qata näimnga ya ninä'ma tam ya qhainangana. Qaka miyo'a nimnga'ma ya ninä'ma ya qhainangana qutanqa ti.

11. Ha utä'na Yäwe Nkoto tha qutanqa ti. Ma anga awä to'o qätä'nauntä niyatn ti'ina. Qaka miyo'a qiyangana qätikngava qutanqa ti. Ha'a qi iya hauka ni mänqa ya'atnana eknga qäta yä'ä nanatnga mhe'ä tiyana qutanqa ti.

12. Ha utä'na aqo tha qutanqa ti. Ma nta äpaka niyamakn aqa pmäito'ma qantäpknga eknqi iya auntänqa hauka namta ntäpä'na yä'ä nanatmnga qana qutanqa ti.

13. Ha utä'nauntä Yäwe Nkoto äpaki yätanga nuwiyata tha qutanqa ti. Ntinga anga okä pi'ya niyatn niyatnga qana.

Ha utä'na äpaki sä'ä tha qutanqa ti. A'ana. Smtita aqo atätapu ntä'nanga tawata qantiya tm isaukanga a'ma yä'ä qhui nanatmnga heänqava qutanqa ti.

Nkoto kota nuwiyata pate'a qheänqa'ma tana

14. Äpaki ha utä'nauntä Yäwe Nkoto äta smtita aqoinga tha qutanqa ti.

Ma nti a niyatnga'ma anuwa tauntänga quyv'a pmäta'ma hänga'ya fi mätnana. Ma nta qa'va ntäm napmhäunga aqoä ta inä u ke'a aqoä tanqa quyv'a ha napmhäunga qi ntinga aqana okä quyv'ati pmäta'ma qati'yana.

Nti anuwa tauntänga yä'ä qänga nta au'wa fa nuwatn qoäunga watäka a nanatn yakato'i qana. Qamqaminqinä hana yatoängati heta qana qutanqa ti.

15. Inä ntinga äpaki'na qainga napmänga i'na qaingo qnta qana. I ya'u nti'na aväti'ya ha'a qäyaipatata'ma qä'umäthe'ana qutanqa ti. Inä tuwauntänqa nta täwokä ya'u äpaki'ya quwokä ya'u qaingo na'anhou pate'a natnhou qai'ya ha'ama yatoänghuti heta'ma qä'umäthe'ana.

Ha hetängota i'ya qäwo hanqo nti sä'ä mnga qo qäikopvheta qana. Ma ntinga aqo sä'ä yanga hipipingau hi to'ängata watänqa heta qana qutanqa ti.

16. Inä Yäwe Nkoto äta äpaki tha qutanqa ti.

Ntinga ime'ä au'wa nhetnginänqa yä'ä tanga okä na'a hanga pmäta'ma qatäpana.

Ha niyatn yä'ä ime'ä natävatngaunga tanga näunata hänga na'a qäimoto'ängoti pmäta qana qutanqa ti. Ha niyatn nta qoka aqoi'na namtn mtngama nu'umätn ita qana.

Ha napmänga ntinga nta qoko hä'äi napmeä nämeä pmetängota ntinga qata aqoinama nuwiyatn pmäta'ma qä'umäthe'ana qutanqa ti.

17. Äpaki ha nutanga äta Ätäm aqoinga tha qutanqa ti. Ma ntinga nta äpaki qata nuwin isauka okä mänqa ya'atnana qäta yä'ä nanatnga hetäna'ma tha'ama pmäta qana qutanqa ti.

Qoä yä'ä qui'i qiyamaki'yana. Nti'nanga ita qetamanga mäve'a yata qana.

Nta nto wamnga yanga maqnga niyatn okä ha'va hunqa yatoängatauntä ita auntänama temota qana. Qamqaminqinä hana yatoängati heta qana qutanqa ti.

18. Inä nti a niyatnga hetä'ma iya qatä'ä iyanga hanga temota qana.

Ma ntinga nta ita qoäuntänqa namiyatnga anga qaingonqa niyatngauntä namiyatn nta qana qutanqa ti.

19. Ma ita nta wamngauntänqanga nta himauntä hemtnga fe'ängota qimangatauntä temo'ängota nta qana.

Ha yatoängati qhäimangota yä'ä napan äta qoäu'na wä'ängatau qnota qana.

Ma anga ni qoä nakam qäyamaka hetä'ma ntinga qoäoi nhainga'ma nin äta qoä imanta'ma qati'yana qutanqa ti.

20. Ha hetä'na amä'ä aqo qai'ya äpaki'ya ya'va Iviya qutanqa ti. Ma anga tha hetä'ma amä'ä tuwauntä natemhau pmhäuta aqaqoäi'ya aqai'yoäi'ya qäsenki heta hetä'ma ya'va a'ma qutanqa ti. 21. Auntä Yäwe Nkoto yäqoe'a sisipa fi nava hewa na'upuiya qaka niyamaka Ätäm aqoi ta qai'ya äpaki ta isä'ui qaka quyatanqa ti.

Nkoto isä'ui wamngauntä ya qamta'wätanqa'ma tana

22. Ha hetä'na Yäwe Nkoto tha qätanqa ti. Ma amä'ä taqo yä'ä nai'ya hanqo qheänqapä ha'a aqo natemo'a yä'ä awa'ma quyva'ma na'anqa nheta iya qana. Ma aqo na'anqa ha nhe'anga hna wamnga tau napme'änga äta iya mtnga mhäuta a totängotau quwa'i nuwa äta iya aunga isauka namtva nqa'ma qati'yana. Anga mänqa yata'ma qamtangana. Ha nanata napme'änga äta mäpe'a yata'ma napmeä ya qamqaminqinä pmeä'ma qati'yana qätanqa ti. Ma ha ya'ma

YENESISI 4

16

wamnga tau yä'ä mapme'ä yaniya qätanqa ti. 23. Ha natatauntä Yäwe Nkoto amä'ä aqoinga wamnga Ite'nauntä yä'ä ya qamta'wätanqa ti. Ma amä'ä aqoi qai'ya qoäuntä qiyamaka hetä'ma yä'ä qai'ya qoä au wamnga napiyata pmeäta'ma qamta'wätanqa ti. 24. Yäwe Nkoto amä'ä aqoi yä'ä ya ha namta'wätantä änsota yanga maqnqa hanqoä wamnga Ite'na aunga ya'va thauta'ma mapa qiyäpmanqa hintä qu'umäthenqa ti. Ha nu'umäthe'anga äta ta ifeä'oka qasmnga qheänqapä ha'a fati wamnga au ya'va weta'ma qheänqa ti. Ta ifeä'oka qasmnga nanga a wä nauna noe hatoä'na hatoä'na maka niyata weta'ma qheänqa ti. Anga amä'ä hanqo qi iya mtnga mhäuta au'na äta quwa'i pa'ma nupto weta'ma qheänqa ti.

QÄMANGA MPUKA

Mpuka tanga pane'a Inktisiuntänqa Mpuka Yenesisi aunga ti.
Ma Tok Pisin Buk Baibel aunga ya'va tiya ti. Stat.

THE BOOK OF GENESIS
(Selected Portions)
in
The Hamtai Language
of Papua New Guinea

Published by
NEW TRIBES MISSION
P.O. Box 1079, Goroka, E.H.P.
Papua New Guinea